


TEZAU LITURGIC

1 IULIE

ACATISTUL SF. DOCTORI FĂRĂ DE ARGINȚI COSMA ȘI DAMIAN



MOSCOVA, 2000



Акафист

святым безсребренникам и чудотворцам Косме и Дамиану

Римским

Кондак 1

Избраннии чудотворцы, страстотерпцы Христовы и врачеве премудрии, туне подающие здравие в болезнях сущим, похвальная восписуем вам, заступником нашим и в скорбех помощником: вы бо сосуди благодати суще, исцеляете душевныя и телесныя наша язвы. Темже славяще Бога, дивнаго во святых Своих, вас усердно ублажаем:

Радуйтеся, Космо и Дамиане, святии безсребреницы и преславнии чудотворцы.

Икос 1

Ангельскому жительству поревновавше, вся земная презрели есте и, подвигом мученичества венчавшися, лицезрения Господа сил сподобилися есте. Молитесь убо за ны прилежно,

к помощи вашей притекающих и похвальная
вам вопиющих:

Радуйтесь, молитвенницы теплии о чтущих
святую память вашу;

радуйтесь, оставленных врачами неоскудно
исцеляющими.

Радуйтесь, яко дом, имение и вся родителей
стяжания ни во чтоже вменили есте;

радуйтесь, нищия милосердием вашим
препитавшии.

Радуйтесь, страждущия сердоболием
утешавшии;

радуйтесь, чистотою и святостию Ангелом
уподобившиися.

Радуйтесь, светильницы Божественного
света;

радуйтесь, небеснии человецы, земнии
Ангели.

Радуйтесь, яко христианом есте прибежище
непостыдное;

радуйтесь, все житие свое даже до
последняго издыхания в служении Господу
истощившии.

Радуйтесь, всесветлое благодати приятелище,
Духа Святаго сосуди;

радуйтесь, всем призывающим вас скории
помощницы.

Радуйтесь, Космо и Дамиане, святии
безсребреницы и преславнии чудотворцы.

Кондак 2

Видя Господь Бог добрая ваша начинания и
велие ко благочестию усердие ваше, яко вся
земная и благая мира сего уметы вменившие, в
непрестаннем труде любви ради ближняго
пребысте и души своя благими нравы украсили
есте, преисполни вас Духа Святаго, Егоже
лучами озаритися и нам испросите у Христа
Бога, да купно с вами поем Ему: Аллилуиа.

Икос 2

Разумом истиннаго богопознания царя
нечестиваго научили есте, вразумив того силою
словес ваших, имиже дерзновенно Христа
проповедаете. Темже дерзновение ваше
похваляюще, взываем сице:

Радуйтесь, лестию нечестиваго царя не
уловеннии;

радуйтесь, истину Христову дерзновенно
пред ним исповедавшии.

Радуйтесь, прещения его не убоявшиися;

радуйтесь, нечестивых соборища
посрамившии.

Радуйтесь, небоязненнии проповедницы
истины;

радуйтесь, служения идольскаго
истребителие.

Радуйтесь, веры православия поборницы;

радуйтесь, исповедницы непоколебимии,
духа терпения и ревности о славе Божией
исполненнии.

Радуйтесь, немолчнии велений Господних
провозвестницы;

радуйтесь, вернии наставницы богомудрия.

Радуйтесь, Царствия Христова надежнии нам
ходатаи;

радуйтесь, и по смерти вашей нас не
оставляющии.

Радуйтесь, Космо и Дамиане, святии
безсребреницы и преславнии чудотворцы.

Кондак 3

Силою Вышняго, данною вам еще во временней жизни, прияли есте власть чудесно исцеляти всякия недуги; по смерти же вашей наипаче прослави вас Бог многими чудотворении, да вси притекаем к вам, молящися о исцелении от недугов телесных, паче же душевных, и Богу велегласно вопием: Аллилуиа.

Икос 3

Имуще, яко многоценное сокровище, многоцелебныя мощи ваша, радуемся и, любовию воспевающе данную вам от Бога благодать исцелений, благодарно зовем:

Радуйтесь, теплии о нас к Богу предстателие;
радуйтесь, еллинская мудрования ни во чтоже вменившии.

Радуйтесь, Рима светильницы всесветлии;
радуйтесь, омраченных стран просветителие.

Радуйтесь, мужества и терпения наставницы;
радуйтесь, яко неповинне каменное побиение претерпевше, кончину мученическую улучили есте.

Радуйтесь, любве ради Христовы
пострадавшии, и нас небесных благ
причастники приимите;

радуйтесь, раби Божии, от Господа Христа
венцы победы приемшии.

Радуйтесь, дивный и прекрасный смирения и
кротости образ всем показавшии;

радуйтесь, непоколебимое православия
основание.

Радуйтесь, светлая страстотерпцев славо;

радуйтесь, добрии целебницы, ни от когоже
мзды за исцеления вземшии.

Радуйтесь, Космо и Дамиане, святии
безсребреницы и преславнии чудотворцы.

Кондак 4

Буря ярости велия царя Карина не возможе
поколебати души вашея, и егда вернии в некоей
пещере вас скрыша от яти вас ищущих, волею
воином предстали есте, вопиюща: нас поимите,
мы бо есмы, ихже ищите, неповинных же
отпустите. Таже веригами обложени бывше, в
Рим отведостесь. Мы же, веру вашу и вериги
лобызающе, поем Богу: Аллилуиа.

Икос 4

Слышавше римстии людие велию вашу ко страждущим любовь и чудесное врачевание ваше, отвсюду устремляхуся к вам с верою в целебную благодать Божию, в вас действующую; приемлюще же скорое исцеление, прославляху Бога, вас же, милосердых целителей своих, величаху, воспевая сице:

Радуйтесь, Бога истиннаго непреборимии проповедницы;

радуйтесь, оружие Креста Христова добropобедно взявшии.

Радуйтесь, блазии врачеве, страждущим скории помощницы;

радуйтесь, вся немощныя туне врачующии.

Радуйтесь, и ныне исцеления обильно источающии;

радуйтесь, милостивии утешителие в бедах и скорбех сущим.

Радуйтесь, во всяких обстояниих нас защищающии;

радуйтесь, беспомощных спасительное призрение.

Радуйтесь, праведных преславное украшение;

радуйтесь, предстательство наше крепкое.

Радуйтесь, прилежнии о нас к Богу молитвенницы;

радуйтесь, всем, верою призывающим вас, скории помощницы.

Радуйтесь, Космо и Дамиане, святии безсребреницы и преславнии чудотворцы.

Кондак 5

Боготечным воистину путем шествовасте, раби Христовы, егда во узах в Рим ведоми, за еже идолом не послужисте, Христови же единому поработасте, горькая испытания терпели есте, святии; но вся претерпесте за возлюбльшаго вас Христа. Темже великому терпению и крепцей любви вашей ко Господу дивящися, купно с вами поем Ему: Аллилуиа.

Икос 5

Видев царь, яко силою Христовою исцеле, хвалу Тому воздаде; мы же, славяще Бога, ублажаем вас, славных угодников Его, вопиюще сице:

Радуйтесь, горняя паче дольних
возлюбившии;

радуйтесь, ангельскому житию на земли
поревновавшии.

Радуйтесь, яко, многобожие отринувше,
родительскаго благочестия не отступили есте;

радуйтесь, яко вся имения своя, по словеси
Господню, нищим раздали есте, да Христа
приобрящете.

Радуйтесь, не словом точию, но множае паче
делом и непрестанною к Богу молитвою иных
поучившии;

радуйтесь, неоскудный источник исцелений и
ныне являющии.

Радуйтесь, изливанием чудес, данных вам от
Бога, нас обогащающии;

радуйтесь, в самих себе храм Богу
уготовавшии.

Радуйтесь, скорое нищих услышание;

радуйтесь, скорбных приятное попечение.

Радуйтесь, ненадежных известное надеяние;

радуйтесь, болящих скорое врачевание.

Радуйтесь, Космо и Дамиане, святии безсребреницы и преславнии чудотворцы.

Кондак 6

Проповедницы имене Христова в животе своем бывше, и ныне силу Того свидетельствуете чудесы, от иконы вашей источаемыми, и якоже веры иногда жены некия не презресте, но во сне явльшися ей, облегчение в недуге даровали есте; сице и наших молений и пений гласы услышите, о святии безсребреницы! Вере же и любви людей ваших внемлите и покров нам свыше даруйте, хвалящим вас и поющим Богу: Аллилуиа.

Икос 6

Возсия, яко свет, правда ваша, егда укоряема на судици царя, дерзновенно рекосте нему: не волшебною хитростию врачуем болезни, но силою Спаса нашего Иисуса Христа, якоже Той заповеда, глаголя: болящия исцеляйте, прокаженныя очищайте, туне приясте, туне дадите. Темже дерзновению вашему дивящися, ублажаем вас сими:

Радуйтесь, образ твердости и веры нам показавшии;

радуйтесь, райския радости присно наслаждающийся.

Радуйтесь, премудрии сеятелие благочестия;

радуйтесь, славнии проповедницы православия.

Радуйтесь, учителие, к Небеси наставляющии;

радуйтесь, чистаго и непорочнаго жития неусыпнии хранителие.

Радуйтесь, теплии послушателие молящихся вам;

радуйтесь, ко спасению изящнии и вернии путеводителие.

Радуйтесь, благочестно и богоугодно жити хотящим блазии наставницы;

радуйтесь, ходатаи благих всем, почитающим память вашу.

Радуйтесь, добре течение свое скончавшии;

радуйтесь, венцы правды от Владыки Христа приявшии.

Радуйтесь, Космо и Дамиане, святии безсребреницы и преславнии чудотворцы.

Кондак 7

Хотяще силу Христову злочестивому царю открыти, Духа Святаго исполнени рекосте: буди посрамлен, о Карине, и с богами твоими! И абие ему лице изменися, и выя совратися, и, молящися к вам, глаголя: се ныне вижду, яко раби есте Истиннаго Бога. Молю убо вас, да якоже иных уврачевасте, сиче исцелите и мене, да и аз купно с вами воспою Богу: Аллилуиа.

Икос 7

Дивнии о нас молитвенницы, целителие душ и телес наших и ходатаи спасения вечнаго, благодарным сердцем воспевающе хвалебную песнь Богу, даровавшему нам таковых великих чудотворцев, приносим и вам похвалы сичевья:

Радуйтесь, Ангелов терпением вашим удивившии;

радуйтесь, божественным сиянием чудес своих вся просветившии.

Радуйтесь, скории от всяких болезней и безмезднии врачеве;

радуйтесь, заступлением вашим разслабленныя исцеляющии.

Радуйтесь, от неисцельных болезней здравы
воздвизающие;

радуйтесь, достойне совершивши земный
подвиг жития вашего.

Радуйтесь, о нас, обнаженных добрых дел,
присно к Богу предстательствующие;

радуйтесь, яко сиянием премудрости, от
Господа вам данная, всех верных просвещаете.

Радуйтесь, молитвенницы о нас и заступницы
наши предивнии;

радуйтесь, доблии страстотерпцы Христовы.

Радуйтесь, кровьми своими землю
освятивши;

радуйтесь, идольское безумие обличивши.

Радуйтесь, Космо и Дамиане, святии
безсребреницы и преславнии чудотворцы.

Кондак 8

Странное мирови житие ваше видяще,
устранимся и мы того сует и, ум на небеса
предложше, возопиим к вам, святии
безсребреницы: утолите болезни, источая
благодатная врачевания всем, усердно к

помощи вашей притекающим и вопиющим Богу:
Аллилуиа.

Икос 8

Все житие ваше на земли любовью к Богу и к ближним исполнивше, святии безсребреницы Космо и Дамиане, скории и ныне помощники являетесь всем, с верою призывающим вас; не точию бо близ притекающим ко святым мощем вашим, но и далече сущим исцеления источаете. Темже приносим вам похвалы сия:

Радуйтесь, Единому Богу, в Троице славимому, верно послужившии;

радуйтесь, единое еже на потребу премудро избравшии.

Рядуйтесь, яко в неустанном труде и подвизе дни и нощи ваша без всякаго уныния препроводили есте;

радуйтесь, яко сицевым вашим тесным и скорбным житием славу Божию в человецех умножили есте.

Радуйтесь, доблии Христовы последователие;

радуйтесь, яко научители и творцы Христовых заповедей явились есте.

Радуйтеся, яко именами велиих в Царствии
Небеснем наречени бысте;

радуйтеся, славою Христовою весь мир
озарившии.

Радуйтеся, яко страданием вашим
безстрастие прияли есте;

радуйтеся, яко мученическою смертию
безсмертие стяжали есте.

Радуйтеся, яко Ангели, на небеси и на земли
прославленнии;

радуйтеся, яко Богу ныне венценосни
предстоите.

Радуйтеся, Космо и Дамиане, святии
безсребреницы и преславнии чудотворцы.

Кондак 9

Всякое естество человеческое удивися
сиянию в вас благодати Божией, святии Космо и
Дамиане, егда нечестивый царь Карин, узрев
чудеса, от имени Господа Иисуса Христа вами
творимая, уверова и прослави Бога. Темже и
мы, славяще давшего вам сицевую силу, поем
Ему: Аллилуиа.

Икос 9

Вития многовещанная недоумеют довольно изобразити обилие любве ваша, еуже преисполнени бысте, святии угодницы, к человеком о Господе. Сего ради из глубины сердец наших вопием к вам:

Радуйтеся, Господу своему даже до смерти поработавшии;

радуйтеся, огнем любве Божия восплаяеми, огонь жертв идольских угасившии.

Радуйтеся, ближняго паче самих себе возлюбившии;

радуйтеся, яко болящия и недужныя посещали есте.

Радуйтеся, нужды убогих предварявшии;

радуйтеся, печальных утешителие.

Радуйтеся, отчаянных заступницы;

радуйтеся, сирых питателие.

Радуйтеся, люте страждущим помощницы;

радуйтеся, угнетенных свободителие.

Радуйтеся, яко, добре течение скончавше, ко Христу вознесостеся;

радуйтеся, яко в Царствии Его водворяетесь.

Радуйтеся, Космо и Дамиане, святии безсребреницы и преславнии чудотворцы.

Кондак 10

Спасти хотя многия, яви нам Господь вы, чудотворцы Своя: кто бо не умилился, видя ваше безмерное ко всем сострадание; кто ли вы не ублажит, яко не токмо человеки от недугов исцеляете, но и скоты милуете; не отрините убо и наших молитв, но на вся ны неоскудно великия и богатя ваша милости излейте, да вопием Богу: Аллилуиа.

Икос 10

Стены есте всем, похваляющим чудеса ваша, о безмездницы, и к заступлению вашему прибегающим; стены и забрала есте, ограждающия от всех бед усердно в помощь вас призывающим. Темже убо и нас от нищеты, напастей, недугов и скорбей оградите, молимся и тепле вопием к вам:

Радуйтеся, адамантов крепость в терпении превозшедшии;

радуйтеся, неповинно от зависти сребролюбца пострадавшии.

Радуйтесь, славнии в бедах заступницы;
радуйтесь, немощных и обидимых
укрепление.

Радуйтесь, крепцыи в напастех защитителие;
радуйтесь, убогих и нищих всещедрии
обогатителие.

Радуйтесь, алчущих милостивии кормителие;
радуйтесь, болезнями и тяжкими недуги
одержимых премудрии уврачевателие.

Радуйтесь, с верою к вам притекающим от
всех скорбных обстояний теплии защитителие;
радуйтесь, яко память ваша всеми славима
на земли.

Радуйтесь, яко имена ваша написана суть на
Небесех;

радуйтесь, яко от Бога препрославлени есте.

Радуйтесь, Космо и Дамиане, святии
безсребреницы и преславнии чудотворцы.

Кондак 11

Пение всеумиленное, ныне нами приносимое,
несть довольно к похвалению преславных
подвигов и трудов ваших, яже Христа ради

подъяли есте в животе своем; обаче дерзаяще просим, усердное моление наше приемше, и нас от бед своими молитвами избавите, да умиленным сердцем воспоим Богу: Аллилуиа.

Икос 11

Светозарный и небесный ум явили есте иногда пред Карином, заблуждение того обличая; ныне же нетлением мощей ваших и множеством чудес православие утверждаете. Темже благодарственно зовем:

Радуйтесь, Ипостасное Слово дерзновенно проповедавшии;

радуйтесь, силу идольскую добropобедно упразднившии.

Радуйтесь, яко вами попрося служение бесом; радуйтесь, яко вами поклонение Христу проповедася.

Радуйтесь, учителяе премудрии;

радуйтесь, всех добродетелей неленостные исполнителие.

Радуйтесь, яко по трудех земных в селениих небесных ликовствуете;

радуйтесь, яко и по преставлении своем нас не оставляете.

Радуйтесь, яко всем, с верою призывающим вас, скорую помощь подаете;

радуйтесь, святии врачеве, яко болезни наша исцеляете.

Радуйтесь, молитвы верных не отречающии;
радуйтесь, и о нас недостойных у Престола Божия ходатайствующии.

Радуйтесь, Космо и Дамиане, святии безсребреницы и преславнии чудотворцы.

Кондак 12

Благодать, юже даде вам Господь Бог, целити вся недуги душевныя же и телесныя, днесь собра нас, да почтим память вашу, святии безсребреницы Космо и Дамиане, благоговейно убо взирающе на честную икону вашу и со умилением сердца к ней припадающе, молим избавитися всем нам от всяких зол и болезней, да воспоем вси Богу: Аллилуиа.

Икос 12

Поюще чудеса ваша, восхваляем труды и подвиги, ублажаем мученическую кончину,

почитаем ходатайство и сильное заступление
ваше о всех, требующих помощи вашей;
величаем подателя всех благ Бога, даровавшего
нам толико дивных молитвенников, и со
умилением зовем:

Радуйтесь, Иисуса Господа верно
проповедавши;

радуйтесь, истины Его доблии свидетелие.

Радуйтесь, теплии о нас у Престола Его
предстатели;

радуйтесь, телес наших благосострадательнии
врачеве.

Радуйтесь, Царствия Небеснаго и вечных
благих наследницы;

радуйтесь, по Бозе все наше упование.

Радуйтесь, миро благовонное исцелений
источающи;

радуйтесь, страстей злосмрадие молитвами
своими отревающи.

Радуйтесь, исцелений дателие и чудес
источницы;

радуйтесь, светоноснии столпи церковнии и
забрала недвижимая.

Радуйтесь, винограда истинного
божественных лозы;

радуйтесь, двоице световидная мудрых
безсребреников.

Радуйтесь, Космо и Дамиане, святии
безсребреницы и преславнии чудотворцы.

Кондак 13

О предивнии безсребреницы, чудотворцы,
целителие и славнии угодницы Божии, Космо и
Дамиане, примите моления сия наша, от
сокрушеннаго сердца возносимая; исцелите
многообразныя недуги наша и теплым
предстательством вашим испросите нам от
Христа Бога избавление от всех бед и напастей,
прощение прегрешений наших и благую
надежду вечнаго спасения, да сподобимся с
вами и со всеми святыми в безконечныя веки
воспевати Богу, Спасителю нашему: Аллилуиа.

*Этот кондак читается трижды, затем икос
1-й «Ангельскому жителству...» и кондак 1-й
«Избраннии чудотворцы...».*

Молитва первая

Чудотворцы славнии, врачеве безмезднии,
Космо и Дамиане! Вы от юности Христа Бога

возлюбивше и Того повеления всем сердцем соблюдающе, аще и вдасте себе учению врачебному, но добродетельнаго ради жития и чистоты душевныя, силою Христа Бога, не врачевания токмо искусство, но паче неоскудную благодать исцеления всяких недугов от Бога прияли есте. Отнюдуже любовь и милосердием к недугующим подвигаеми, не токмо людям, но и скотом исцеления болезней подаваете, неисчетным множеством чудес ваших весь мир наполняете, и не телесныя токмо недуги исцеляете, но и верою Христовою души просвещаете, в терпении болезней укрепляете, в тяжких недугех о исправлении жития вразумляете и ко Христу покаянием привлекаете. Темже ныне и нас, припадающих к вам пред честною иконою вашею, скоро услышите, юныя дети, вашей помощи во учении книжном просящия, вашими молитвами наставите, да вашему житию ревнующе, не земное точию научение приобрящут, но паче во благочестии и правой вере выну да преуспеют. На одре болезни лежащим, человеческия помощи отчаянным, к вам же тепле с верою и усердною молитвою прибегающим, исцеление болезней вашим милостивым, чудодейственным

посещением даруйте. Многожды в болезни впадающия и от лютых недугов в уныние, малодушие и роптание пришедшия, данною вам от Бога благодатию в терпении утвердите и наставите, да уразумеют волю о них Божию святую и благую и сами себе и живот свой воли Христа Бога предают. В недужех сущих, о исправлении же жития не радящих, во гресех не раскаивающихся, сердцем ожесточенных сокрушите во спасение и к покаянию призовите, да немощни суще телом, здрави пребудут душею, и причастницы соделаются Божия спасительныя благодати. Братию святаго храма сего, вашему святому заступлению от Бога врученную, и всех к вам усердно прибегающих невредимы сохраните от долгонедужия, от болезней лютых и неисцельных, от расслабления тела, от иступления ума, от смертоносныя язвы, от внезапныя смерти, и всемогущим ходатайством вашим к Богу соблюдайте в правой вере твердых, во благочестии преспевающих, в добрых делах усердных, в молитве к Богу прилежных, да с вами вкупе сподобятся в будущем веце присно воспевати и славити всесвятое и великолепое имя Отца, и Сына, и Святаго Духа, во веки веков. Аминь.

Молитва вторая

К вам, святии безсребреницы и чудотворцы Космо и Дамиане, яко к скорым помощником и теплым молитвенником о спасении нашем, мы, недостойнии, преклоньше колена, прибегаем и, припадающе, усердно вопием: не презрите моления нас, грешных, немощных, во многия беззакония впадших и по вся дни и часы согрешающих. Умолите Господа, да пробавит нам, недостойным рабом Своим, великия и богатыя Своя милости; избавите нас от всякия скорби и болезни, вы бо прияли есте от Господа и Спаса нашего Иисуса Христа неоскудную благодать исцелений, ради твердыя веры, безмезднаго врачевания и мученическия кончины вашей. Услышите нас, молящихся, и благоприятным ходатайством вашим испросите у Христа Бога православным людям на враги победу и одоление. Паки, припадающе, прилежно молим: испросите нам от Господа вся благополезная, яже в животе нашем временнем, наипаче же ко спасению вечному служащая, да сподобимся молитвами вашими улучшить кончину христианскую, безболезненну, непостыдну, мирну, и да избавимся от козней диавольских и вечныя муки, безконечнаго же и

блаженнаго Царствія Небеснаго наследницы будем. Ей, угодницы Божии, не престаите молящися за ны, с верою к вам притекающія. Аще бо по множеству грехов наших и несмы достойни милосердія вашего, обаче вы, вернии подражателие человеколюбія Божія суще, сотворите, да принесем плоды достойны покаянія и в вечный покой достигнем, хваляще и благословяще дивнаго во святых Своих Господа и Бога и Спаса нашего Иисуса Христа, и Пречистую Матерь Его, и ваше теплое заступление, всегда, ныне, и присно, и во веки веков. Аминь.

